
SAAMMAASSINIARNERUP AQQANI

Suliassiisoq: Saammaateqatigiinnissamut Isumalioqatigiissitaq

Isiginnaagassiamik allattoq: Vivi Sørensen

24.10.2017

SAAMMAASSINIARNERUP AQQANI

Isiginnaagassiannngortitsisoq: Vivi Sørensen

Una isiginnaagassiaq monologinik imaqarpoq, monologit **Saammaateqatigiinnissamut Isumalioqatigiissitap** nunarput tamakkerlugu apersuineranit aallaaveqarput. Monologit akornanni pisut siunnersuutaannaapput, isiginnaagassiannngortitsinermit allannguisoqarsinnaavoq.

Apersorneqartut aqqi allanngortinneqarnikuupput ilisarnarsinnaanerannullu ersiutaasinnaasut allanngortitaallutik.

Inuttat monologinilu pineqartut qulequtaat:

- Arnaq – oqaluttuartoq, oqaluttuat silarsuaanneersoq
- Elias – Ataataqarani perornermi unammillernartut
- Anaanaasoq, Eliasip nulia Tinallu arnaa
- Tina – Nunatsinni perorsaariaaseq imminullu tatigineq, 30-t sinnerlugit ukiulik. Avannaamioq.
- Trine – Meeraalluni Danmarkiliartitaasimanerminik qaangiinngisaannassangatitttoq
- Arnannguaq – Meeqqani kalaallisut oqalulerniassammat Nuuk qimakkaa
- Piitaq – Inatsisitigut ataataqanngitsoq
- Larsine – Sorsunnersuaq uagutsinnut iluaqutaasoq ilinniarnelut
- Sakkak – Ataataarunneq, meeraanermit piitsuuneq
- Nivikka – GU-mi ilinniartitsisutut qallunaarpassuit akornanni sulineq pillugu
- Ole – Qallunaatoorsinnaannginnerup kingunipilua
- Nuka – Qallunaanit naqisimaneqarneq
- Sika – Kinguaassiutigut atornerlugaasimaneq
- Lars - Kalaallit nammineersinnaasunngoqqinnissaat

1 -Prolog

*Isiginnaartitsivik taartuinnaavoq, qulleq isiginnaartitsiviuk talerpiatungaani
sallaatsunnguamik sakkortusiartortup nittaannera ersersippaa. Aput nakkarujoortoq Arnap
inngernera sallaatsumik aallartippoq, inngerut itsarnisaq. Arnaq nalavoq. Inngerut naavaa,
nipilersuutit ataasiakkaat tusarsaalerput.*

Isiginnaartitserpalaartumik pissuseqarluni, ilumooraaavissorlunilusoq:

Arnaq: Nuna manna. Arnap nateq attoriarlugu massippoq.
Inuit makku. Arnap isiginnaartut isigai.
Inuit nunaat. Arnaq sanimut isigaaq.
Nanivaat. Nunassiffigaat. Nammineq pigaat, nammineq inuupput.
Inuit nanisaat, ujagaat, ikaarfiat.

Oqaluttuarluni aallartippoq (Nipersuutut ataasiakkaat pissanganarsaapput)

Qangarsuarooq ataataqarujooq arlalinnik ernilimmik. Erneri allilerput, allilerput.
Aqukkuminaassivallaaqimmata pissusiilu peqqarniissigaluttuinnarmata
ataataasup ernini sapileramigit qimallugit ungasissumut nuuppoq.
Erneri inuunngitsut, inuppalaanngitsut qimmissut pissusillit isumaqatigiipput
ataatartik takoqqissagaluarunikku neriniarlugu.

Tassami takoqqinnialeramikku. Sivitsunngitsoq ataataasup ernini tikeraarpai,
ileqqullu malillugit puisiminermik pajulluni. Ernerisa aterfigaat. Ataataasup
puisimineq tunniuteriannigikkaaluunniit ernerisa qimmiisat ataatartik
nereriikatappaat. Ataatartik nerereeramikku pajugutaa puisimineq aamma
upappaat.

Qimmiisat inuunngitsut imminnut qallunaanik taajulersimasut nunaminni
uinngalertornernerminni imminnut inummik taasumik tikinneqalerujat. Inuk
ipulluni timmianik pinialuppoq, qarsuminik timmiannguaq unioramiuk sissamiit
illarpaluk tusaalerpaa. Sunaaffa qallunaap sissamit isigigaani. Qallunaap inuk
uniorloq takugamiuk illaatigigaa: 'Aalassarippallaaqigavit timmiaasaalerpunga,
toqoriaraluarnianga ata uniornanga', qallunaap illapalaajutigaluni nunamut
imminut miloriutiitigaluni oqakaseqaaq. Inngerlaannarlu inuup
uniunngilluinnarlugu toqoqaa.

Tassagooq taamanersuaq qallunaap taassuma toqunerata kingorna inuit qallunaallu isumaqatigiinngittualersimapput imminnullu sorsuuttualerlutik. naggataatigullugooq qallunaat uppisinneqarput inuillu naalaganngorlutik.

Nipilersugaaq uniimivoq. Qulliit ikipput. Isiginnaartitseriaaseq ilumoorsaarunnaariasarpoq ulluinnarpalaalerluni:

Arnaq: Aap, aap. Nalunngilara. Nalunngilara! Qanga itsaq susoqarsimanera tusaakatapparsi; qalunaatsiaat tikittut, Navaranaaq, qallunaatsiaat tammarnarat, Hans Egede, suna tamarmi mumippoq, ajortut ajunngitsullu pipput bla bla bla, inuusitoqqatsinnut uteqqinnavianngilagut, nunasiaataasimanerup pisimanera pinngitsuusaarsinnaanngilarput. Jaa jaa jaa... kisianni ilaa? Inoqatisi, uku nunaqqatisi saammaakkusuttut makku, ima oqaluttuassaqarput:

Inuit assigiinngitsut nipaata sumitamaanit tusarsaalerput. Ilaanni imminnut qalleraattut. Arnaq suli isiginnaartitsivimmiippoq.

Elias: Meeqqat ataallit usorisarnikuuakka. Qamuuna. Immaqa ataataqaralaruma taamak pineqarnavianngikkaluarpunga.

Tina: Kina oqarpa nipaanneq ajortuusooq? Soorunalimi nipaappallaaraanni tunniussinani apeqquserneqarsinnaavoq taanna. Kultureraarput aamma nipaanneq.

Inuk oqaluttuaannartussaasimava?

Trine: Toqussara tikillugu narrujummisimaassaanga. Paasisinnaanngilara. Paasisinnaanngilara. Isumaqqarput qallunaat kulturiat kalaallit kulturiannit pitsaanerusooq, qanoruna ittut?

Sakkak: Qallunaat naalagaaffianut uanga saammaassisinnaanngilanga.

Larsine: Nunatta pissarititaata pingaarnersaa tassaavoq inuk.

Nivikka:

Inuiaqatigiinni akisussaaffimmik tiguisoqartariaqalerpoq, apeqqut silaannarmiitsikkaanni susoqarnaviangilaq. Paaseqatigiinnissaq isumakkeerfiginninnissarlu pisariaqalerput.

Lars:

Taamanikkut kristumiuussuseq eqqunneqanngikkallarmat maani inuusut naqisimaneqanngillat, imminut napatipput, imminut inuutipput, avataaninngaanniit ikiorneqanngikkaluarlutik nalunngilaat inuusinnaallutik, taamaattumik nammineq napatinniarlutik inuusinnaasimapput. Ullumikkulli maani kinguaariit eqqarsaatigigaanni amerlasoorpassuupput utaqqiinnartunngornikuusut, allattoqarfiup imaluunniit inunnik isumaginnittoqarfiup aatsaat ikiorpatsik nammineq inuusinnaasussat.

Arnap isiginnaartut saappai:

Arnaq:

Imminut namminerlu tunuliaqutarisanut saammaateqatigiinneq
Nammineq oqaluttuarisaanermut saammaateqatigiinneq
Inuiaqatigiinni kalaallini eqimattat akornanni
saammaateqatigiinneq
Kinguaariit akornanni saammaateqatigiinneq

Elias uersagaq

Isiginnaartitsiviup tunuliaqutaa nueriasaarpoq saavanut piimilluni, ullumikkut ini, kalaallit 2017-imi inaat. Assit nivingapput, qalipakkat, ernuttat. KNR Radio ingerlavoq. Aappariit utoqqasaanngulersut kaffisorusaarput, paniat inersimasoq isersimavoq. Tassanngaannaq raatiu nipparujussuarpoq. Saammaasseqatigiinneq eqqartorneqarpoq. Suna tamarmi allanngorpoq.

Tusagassiortoq:

Saammaateqatigiinnissamut isumalioqatigiissitap inuiaqatigiit nukittorsassavai. Naalakkersuisut Siulittaasuat isumaqarpoq inuiaqatigiit kalaallit inissisimaffipput pillugu, Saammaateqatigiinnissamut Isumalioqatigiissitaq ilisimatuussutsikkut isummersuutinik nutaanik saqqummiusseqataassasoq. Neriupporlu atuakkiortut, taalliortut, meeqqat inuusuttullu aamma assigiinngitsut akornanni oqallinnermik pilersitsissasoq.

Paniusoq sofamiit masseriasaarpoq. Raatiu qamiutigalugu oqarluni:

Tina: Haa.. Saammaasseqatigiinneq, qanormiaasiit..

Paniusoq ingeqqippoq, kaffisorpaluk, kaageerartorpaluk. Nipaassuseq. Elias oqalulerpoq. Eliasip isiginnaartut oqaluttuuppai issiaqatini takusinnaanagillusoq, soorlu silarsuarmi allamiittut. Paniusup anaanaasullu isiginnaartut takusinnaanngillaat.

Elias:

Isumaqarnikuuvunga meeraallunga nalinginnaasoq, meeqqatulli allatulli meeraallunga. Atuarlernissama tungaanut. Atuariartorama suna tamarmi allanngorpoq. Paasilerpara meeqqat allat ataataqartut, uangalu ataataqanngitsunga. Akerartortinneq misigisalerpara. Pinnguartilluta, atuartilluta oqarfigineqartalerpunga: "Uersagarsuaq!"

Elias unikaallappoq

Meeqqatulli allatulli peroriartorpunga alliartorlungalu,
paasiuminaatsittuagarali tassa aallartippoq. Atuariartornerma
kingorna kanngusaarneqartalenera:

"Uersagarsuuvutit."

Sumik ilisimasaqarnanga inersimasut arnat utoqqaat
takkuteriasaartarput isallunga:

"Uersagarsuit tamaaniittanngillat angerlarniarit"

Qanoq oqassanerpunga, meeraallunga aali eqqarsartarlunga: kiap
ikiussavaanga? Sooruna? Qiallunga angerlartarpunga. Takusarpara
anaannguara aamma qullilisoq. *Elias qissaserpoq.*

Utoqqatserpunga.

Meeqqat ataatallit usorisarnikuuakka. Qamuuna. Immaqa
ataataqaraluaruma taamak pineqarnavianngikkaluarpunga. Allaat
anitsiarluta ilinniartitsisoq oqartalerluni:

Una uersagarsuaq kanngusaarniarsiuk uersagarsuaruna.

Aali ilinniartitsisoq, ajoq. Tassa pissutsit taamaapput. Ulloq manna
tikillugu ikiorserneqartussaasimagaluarpunga, kisianni nammineq
ilunni, imminut suliarisimavunga. Taavalu anaanaga
oqartarsimavoq:

Sakkak illit pisinnaanngoruit ilinniagaqassanngikkuit sulinermi
ilungersortariaqarputit ilinnut iluaqutaaniassooq. Qanorluunniit
suliaq oqimaatsigigaluarpat illit nammineq pisinnaavutit.

Piumaffigineqaraangavit eqiasunngisaannarit, iluaqutigiumaarpata.
Ajortumik pineqaruit akinak.

*Eliasip oqaluttuani naaginnarlugu kaffisornerminut uteqqippoq. Kaageerartorput. Elias
nulianilu anillapput.*

Taartuinnanngorpoq.

Tina sofami issiavoq. Qamuteeqqat pinnersaatit tiguai isiginnaartullu saallugit oqaluttualerluni.

Tina:

Meeraalluta qimusseraangatta, narsakkut qimussertilluta ingerlaasaarluta ataatama ajattarpaatigut. Oqarfigineqarneq ajorpugut 'ajalerpakkit'. Taamanikkut paasisinnaangilara sooq ajattarneraatigut. Arpakkutta arpakkutta. Angumersiniaalluta. Kingorna paasilerparara sooq ataatama ajattarnikuugaatigut; sikukkut qimusseraluarutta sikup oqarfiginaviannngilaatigut "aserulerpunga piareersimaniaritsi." Ataatama meeraalluni taamaanneqartarsimanini uannut ingerlateqqippaa oqarnani. Iliuseqarluni.

Meeqqat atuarfianni atuarallarama oqarfigineqartarpunga nipaallunga; nipaappallaaqaangagooq oqalunnerusariaqarpungagooq. Angerlarsimaffitsinnili allaaneruvunga. Taamani aatarsuara atuagaqarami, taakkua atuartarpakka ilaqutariillutalu eqqartuisarluta. Immaqa uaniinnerugunarpoq ilinniartitsisut naleqqussarfigisarakkit. Kina oqarpa nipaanneq ajortuusooq? Soorunalimi nipaappallaaraanni tunniussinanilu apeqquserneqarsinnaavoq taanna. Kultureraarput aamma nipaanneq.

Oqaluttuaannartussaasimava inuk?

Unikaallanneq

Uanga perorsaasuuvunga.

Meqqerivimmi suligallarama angajoqqaanut saqqummiinaraangatta sulisut suliassaannik tuniorartarpakka, angajoqqaanut saqqummiussassaannik. Taamani sulisut ilai oqartarput saperlutik, qallunaatoorsinnaannnginnamik imaluunniit perorsaanelerinerinermik suliaqannginnamik. Taava imannak apeqqut saatikkutsigu: meeqqeriviup siunertaa qanoq oqarpa? Oqarpoq meeraq imminut ilisimaarinerunissaa, imminut naleqartinnerunissaa anguniarneqassasoq. Taassuma anguniarneqarnissaa kikkut suliarisussaavaa? Sulisut. Meeqqap naleqarnini kinaaninilu ilisimaarinerunissaat anguniartillugit sulisuusugut oqaannarniarutta 'uanga saperpunga', taava qaqugu meeqqanut naleqartitsisumik suliaqarneq aallartissagatsigu?

Taanna sulisoq imminut naleqartilluni, piukkulluni tunngaviliisussaavoq.

Sooruna immitsinnut taamatut inissitsittartugut?

Taamatut sapertutut eqqarsartarneq suminngaanniit aallaaveqarpa?

Nunasiaataasimaneq oqaluuseritillugu, eqqarsaatigisariaqarparput Hans Egede apereqqaarnani takkuttoq. Hans Egedep isiminit takusani aallaavigalugit naleqqussarfigeqqaarnata upperisatsinnik apeqqusiivoq. 'Ukua inuit inuiaqatigiit inuit inooriaasii kipiluttunarput imaluunniit apeqquserneqarsinnaammata allangortariaqarput', taamatut siuligut isigisimavai, 'ikiorneqartariaqarput'. Apeqqusernarpoq kiamuna isaanik inooriaaserput naammassimanngimmat ikiorneqartariaqarsimasugut?

Siulersuagut inuit taava isumaqalersimapput 'aa takkuttoqarpoq una palasersuaq oqarluni inooriaaserpunngooq ajorpoq, kukkuneruvoq, aaqqiiniartagooq'. Taamanikkulli qamani inuup eqqarsartaasiani suli piusimasoq uanga pasivara. Ilinniarluarsimasut avataaniit tikittut siulliutittarpagut, imminut kingulliutilluta.

Ilinniarluarsimasup uagutsinnit pisinnaaneruneranik eqqarsariartaaseq, kinguaariinnit kinguaariinnut kingornussatut silaannarmi suli tamaani ingerlaarpoq. Uffa, uanga ilinniartut oqarfigisarikka: nunassinni ineriartorpusi, nunap ineriartornera nalunngilarsi, ukiukkut aasakkullu najugaqarfigaarsi, oqaatsisi atorpasi, inooriaasersi aqartarnerit, perusinerit taavalu kalaallit isiminnik anngaasarnerat, ilassisarnerat, naameertarnerat - taakkua suugamik? Tassa taakkua naleqartitassagut. Taakkua pigisasi aallaavigalugit oqaatsinik allanik ilinniarussi ilisimasasi annertusiartussapput nunatsinnilu siuarsaaqataallusi.

Tassa taanna naleqqussarneq. Uagut

naleqqussarfigineqalernissatsinnut piffissanngorpoq.

Sunaluunniit iluatsittumik siunnerfeqaraanni iluatsissinnaasarpoq.

Tina anillappoq. Isiginnaartitsivik taartuinnanngorpoq.

Arnaq anillaqqippoq. Isiginnaartitsivik tæppersuarmik asserpaat aquullu toorlugu. Seqersittaammi Trine nuivoq. Assilisat Danmarkimiippasipput. Trine arnaavoq utoqqasaaq, meeraalluni Danmarkimut ukiiartortitaanikuuvoq, kalaallisut oqalussinnaajunnaarnikuuvoq.

Trine:

Ulloriannguaq Kristiansen nammineerluni Danmarkimiinnikuugunartoq siunnersuuteqarpoq, kalaallit nukappiaqqat spejderit ilaat ulluni 14-ini Danmarkimukartinneqarsinnaagaluartut aammalu siunnersuut taanna suli allat tusanngikkat apummik ammalortuliatut assakaatinneqartutut alliartuinnarvissimavoq. Røde Kors, Red Barnet, naalakkersuisoqarfimmi pisortaq Eske Bruun akulerullutik aallartipput aamma ministereqarfimmi allaffimmi pisortaq Ulloriannguaq Kristiansenuulli taassuma isumassarsiaata assinganik isumassarsivoq aammalu tassanngaaniit qanoq iliupajuinnarsinnaanerluta isumassarsiaq taanna pinngorpoq. Tassalu nassuiaat taanna paasivarput. Kisiannili taamaaliorsinnaaner at tupinnaqaaq. Taamaaliorsinnaaner at tupinnaqaaq. Tillinneqarpugut! Peersinneqarpugut nassuiaanneqaratalu, angajoqqaagut sumiinnitsinnik paasitinneqanngillat, najugaqarfitta sumiiffiunik tunineqanngillat. Ukiup aappaa avillugu uagutsinnut allassinnaanngillat, telegrammersinnaanatillu. Eqqarsaatigigaanni anaanamit allagarsisimasuugaanniluunniit.

Unikkallarneq

Anaanangalu oqallisiginikuunngisaannarparput. Taamanikkut uagut meeqqat pilluta oqaluttuat saqqummermata, anaananga oqarpoq salluusoq. Taamanikkut Hjemmet-imi ilanngutassiaq saqqummermat, tassani uanga qanoq sumiginnarneqartutut misigisimasimallunga oqaaseqarlunga, anaanaga Maniitsumi najugaqarpoq "Naamik, anaanat ilaginngilat. Salluvutit, Tinep atuakkiaa eqqunngilaq, salluvutit. Takoqqikkusunngilakkit."

Ukiorpassuarni anaananga angajoralu takunngilakka. Anaanaga isumakkeerfiginngisaannarpara, toqoreeraluarmalluunniit. Isumakkeerfigisinnaanngilara. Allartippaanga aammalu uterteqqinngisaannarpaanga. Eqqortoq aatsaat 50-ileereersunga saqqummerpoq.

Unillatsiarneq

Ukiup aappaa affaq Danmarkimeereerlunga Nuummut angerlarpunga. Inersimasunngoreerlunga paasivara tikikkama aammalu ilaqttama takugaminnga aqqaluara oqarsimasoq: Trine qallunaanngorsimavoq.

Ilaqutanniluunniit najugaqartussaana, børnehjemmimiittussaallunga.

Sorlaqanngitsutut kinaassuseqanngitsutullu misigisimasimavunga. Tujormisarsimaqaanga. Ammima qalipaataa kanngugisimavara. Børnehjemmiillunga ilaanni eqqarsarpunga qaqorsaat aqitsoq annaarniarlugu, qalipaataa errorlorlugu peerniassammat. Qinngasaarneqarsimagaangama errorlorlugu peerniarsarisimavara taamaalorsinnaanangalimi.

Qiallunga siniliinnartarpunga kalaaliulluta oqaatsigut atorsinnaannginnatsigit, illoqarfimmi meeqqat malersorluta qinngasaartarpaatigut.

Misigisimavunga tamaasa atorlugit, kalaaliullunga qallunaajullungalu. Qallunaajullunga misigisimavunga taamaakkaluartorli, qallunaajullunga oqassaguma kukkullunga. Ilaquttannut Aasiannut nuussimasunut tikeraartinneqarpunga, kisiannili iluamik oqaloqatigisinnaanngilakka. Anaananga qallunaatut oqalussinnaanngilaq uangalu kalaallisut oqalussinnaananga. Angajuma ikinngutai uagutsinnukartarput takugaminngalu qimappaannga. Nikorfapput oqaloqatigiillutik qiviartarlutillu. Kinaana? Aperipput. Assorsuaq pakatsinarpoq. Anaanamaluunniit uanga pillunga oqaluttuussimanngilai. Angajora aperaara qanoq oqalunnersut. "Apeqqutigaat suminngaaneernersutit aammalu sooq børnehjemmimi najugaqarnersutit." Uangalu oqarpunga "qatannguteqarlutit oqaluttuutinnginnakkit?" Soorlu uanga suunngitsunga. Kanngusuutigivaannga, piitsummi kisimik børnehjemmimiittunik

meeraqartarput, ilaquuttakkalu piitsuunngillat, uangamiuna poqersuugama misileraanermut toqqagaasunga.

Unillatsiarneq

Misileraanermi tassani kiserngoruttugut, Danmarkki sinnerlugu naalagaaffimmi ministeriunermit utoqqatserfigineqarusuppugut. Suli taanna sorsuutigaarput. Suli meeraaqqatut ikiligaasimasutut qamani misigisimavugut. Naapikkaagatta qiaqqajaasaqaagut, taava qulligut allarteriarlugit immitsinnut eqitaartarpugut. Aaja aajaa tassami, utoqqaligaluarluta suli qiasarpugut. Tamanna iluarsineqassappat utoqqatserfigineqartariaqarpugut.

Unillatsiarneq

Toqussara tikillugu narrussatsimaassaanga. Paasisinnaanngilara. Paasisinnaanngilara. Isumaqaarput qallunaat kulturiat kalaallit kulturiannit pitsaanerusoq, qanoruna ittut?

Arnaq suli isersimasoq, aquummik seqersinneqartoq qamippaa tæppersuaq ammariarlugu anillappoq.

Tunuliaqut tassaavoq Nuup qanga assinga allisingaatsiagaq. Henrik angut Nuummiorpaluttoq 50-it sinnilaarlugit ukiulik isiginnaartut issiaviannit nikuippoq assillu saavanut qeqqilluni. Isiginnaartut isigai. Nuannaarpoq, qiimavoq aallaamallunilu.

Henrik:

Meeeraanera tamakkerlugu eqqarsaatigissagukku nuannersuinnangajannik eqqaamasaaqarfigaara. Meeraqatitta ilaasa aqqusaagaat naak artornarsinnaagaluaqisut. Angajoqqaajusut ilaasa imigassamik ajornartorsiuteqarnerat pissutigalugu. Meeraqatitta ilai oqaatsit kisitsisillu tungaatigut ilikkarniaasaartartut, tusarnaarniarnermik ajornartorsiuteqartut nalaattarnikuuakka. Kingusiinnaa paasilerparput angerlarsimaffimmini arlaatigut ajornartorsiuteqartut eqqumaffigineqanngitsut. Uangali sutigut tamatigut angajoqqaannik tapersersorneqarsimavunga. Imigassamik atuisuunngillat, ataataga ullormut cigaritserpassuarnik pujortartaraluartoq ajortunik misiginngilanga.

Nunaqarfimmi atuarnera aallartippara. Taava Nuummut ingerlaqqippunga. Nipaatsuusimavunga atuaqatikka oqartarnikuupput palasissatut ilinniarnissara ilimagalunga, tassa taamak naalatsigaanga. Kisianni allatorujussuaq pivunga.

Meeqqat atuarfianni 9. klassi ilanngullugu atuarpunga. Angajoqqaakka oqarfigivakka uanga naamik atuaqqissinnaanngilanga unittooqqasutut misigisimagama, niivertarfimmilu ilinniartunngorusunnerarlunga. Handelsskoleruma periarfissat tassuuna atorniarlugit, aamma taanna uggorisinikuunngisaannarpara naak toqqaasimanagera kingornatigut uggorilaartaraluarlugu.

9. klassimi naammassigama niivertarfimmi ilinniartunngorpunga, tassanilu qaammatini siullerni pingasuni lkast handelskostskolemiippunga. Angerlalaariarlunga praktikkeriarlunga niivertarfimmi suleriarlunga tullissaani ukiup affaa semesteri ingerlateqqippara. Angusilluarlunga. Ilinniarnera naammassigakku

aggusti naasoq, novemberi aallartilaartoq ilinniarnera nangeqqippara niuertoq siunnerfigalugu. Tassani angusarissaarlunga aamma pigama uterama ataatama pigaluarpaanga nunaqarfippassuarni niuertut ilinniarsimasut amigaataammata qinnuteqaqqullunga. Ukioq taanna timersortorujussooriarama ataataga oqarfigaara timersortarfeqanngitsumut nuunniarnanga. Ataatama timersorneq qanoq nuannaritigineriga nalunnginnamiuk akuerivaanga. Niuertarfimmiuuvunga, ullaap tungaani regnskabit suliassat allaffimmi sulareriarlugit ualikkut niivertarfimmiittarlunga.

Tassaana qallunaanik ilinniarsimasunik tikittoqartarami. Qallunaat Danmarkimiit tikisitat. Ila uanniinngaanniilluunniit ilinniagakinnerit. Tassami tassa uanga regnskabit sularisarakkit nalunngilara uanniit qanoq akissarsiaqarnerutiginersut. Taamani piumasarigaluarpara akissarsiakka qallunaat akissarsiaattut amerlatigilissasut. Taamami uanga qallunaat nunaanni inatsisit malillugit statsautoriseret revisoriugama. Aperaakka iluarsisinnaanersut. Akineqartartarpunga: naamerluinnaq sumi inunngorsimaneq pillugu akissaatersuineq ingerlanneqartillugu taamaaliorsinnangitsut. Akiuukkaluarama. Naamik. Taava 1975-imi iluarsivigiumaneqanngitsoq qatsutivikkakku taxartalerpunga. Taakkua kalaaliugaluaaraanni qallunaajugaluarunilluunniit isertitaat assigiittaramik. Imaangilaq kalaallit aquttuummata ilaasut annikinnerusumik akiliisariaqartut qallunaajuppallu annertunerusumik. Tassa assigiikkamik.

Henrik kammerserpog

Ilaa oqarsimavugut ilinniarniaritsi ilinniarniaritsi. Taamanikkut landsrådet imannak annertunerusumik oqartussaataasimangillat, qallunaat nunaata naalagaaffiata naalagaanerujussua taamanikkut malunnarami.

Ullumikkut tassa una kalaaliusugut uumitsaatigisartagarput saneqqussinnangilarput, suli maani qallunaarpassuaqarmat Danmarkimi nunaminni suliffittaarsinnaanngitsunik maanili suliffittaarsinnaasunik. Imaluunniit inissisimanertik arlaatigut ajornerusumiittoq qaffassarniarlugu maannga qinnuteqartartut, maanngalu tikikkaangamik ilaatigut maanimiutoqqanik aamma qaavatigut ilinniartinneqartartut, nutserisoqartariaqartartut sullissiniarunik. Tikisitat ingerlaannaq aallaqqittarput

pikkorissariartorlutik, taannaluunniit immaqa kamannarneruvoq.
Taanna unitsinneqartariaqarpoq.
Nunaqavissunik akornatsinni pikkorissorpassuartaqarpugut,
taakkua pikkorissarnissaannut aningaasat atorpeqarunik
pitsaanerpaajuvoq. Nunarpullumi qimallugu
pikkorissartassagaluarunik taakku maangga utissaqqaarput.
Imaanngilaq qallunaaluarama taamatut oqartunga
qallunaaluanngilluaasarpunga. Oqaatsit eqqortut
aninneqartariaqaramik, eqqortittunut annernassagaluarpalluunniit.
Annernaqili soqutaanngilaq, uagut annertarnerput taakkua
misigineq ajorpaat. Kialluunniit nalunngilaa,
nipangiusimaneqaannarpoq. Inissaaleqinerup
atornerlunneqartarnera, kapitalistit qassit manna
iluanaarfigerujussuariarlugu Danmarkimut nuuttarpat tappavanilu
pisoorsuartut Grevetupajaarsuarluunniit inuullutik inuusut.
Nunatsinni aningaasat qaluukkatik taamaalillugit aallaruttarpaat.

*Henrik oqaluattuarluni naammassigami asseq peerpaa. Arnaq igaffimmini igalersoq
isiginnaartitsiviup saamiatungaani takuarput. Arnannuaq. Uia talerpia tungaani issiavoq.*

Arnannguaq arnaavoq 30-it sinnilaarlugit ukiulik igaffimmini eqqarsarpoq.

Arnannguaq:

Inuttut initoorujussuutittagara tassaavoq kalaallisut kinaassuserput. 70-ikkut naajartulernerani inuuvunga, 80-ikkut ingerlanerani meerallunga. Angajoqqaakka 70-ikkunni aalassassimaarluaqataasimaqisut ilagivaat, nunatta namminersoriartornissaanut sorsuutiginnittunut akuullutik. Kalaaliussuseq pillugu isummat ersarissut meeraallungali tusartuarpakka. Isummat taama ittut perorninni ilaaginnarput, taakkuullutik ullumikkut inuunerma ingerlanerani kinaassusera pillugu eqqarsartarninnut tunngaviliilluusuarnikuusut. Meerartaalerama eqqarsaatigilerpara qanoq perorsaassanerlunga. Uanga nammineq perorama kinaassusera toqqammavigeqqissaarlugu, apeqquusiinanga kinaaninnik; taamaattumik pingaartissimavara meeqqakka uanga nammineq taamatut pingaartitara naapertorlugu perortissallugit. Perorsassallugit. Meerara angajulleq Nuummi inunngorpoq, Nuummilu atualerluni. Atualereerami qallunaavaqqatut oqaluttorujussuanngorpoq atuarfigisaani qallunaatut oqaluttut amerlagamik. 4. klassimi erneru qallunaatuinnaq oqaluttunngorpoq. Uagullu kalaallisut oqaaseqarneq pingaarteqalugu, kalaallisut oqaluuttuarterlugu aamma kalaallisut oqalussinnaagaluarluni qallunaatuinnaq akisarluni. Inuttut pingaartitakka; kalaaliuneq- meeqqakka kalaaliusariaqarput, kalaallisut oqaluttariaqarput - nunami maani inuuniarunik pilliuteqartariaqarput; tamakku, uanga nammineq peroriartorninni eqqarsariaaseq pingaartitaq unittutut ilersoq. Takusinnaalerpara erneru qallunaatuinnaq oqalukkusuttoq; kammalaatini ilagigaangamigit, atuarfimmi allaat uagutsinni. Misilittalerparput aalajangeqqissaarluta; kalaallisut oqalussaagut, kisianni iluatsippallaangilaq. Aalajangerpugut ilaatigut taanna peqqutigalugu illoqarfimmut allamut nuunniarluta ernitta qallunaatut oqaluppallaarnera pissutigalugu. Soorunami angajoqqaatut iliuuseqarsinnaagaluarpugut kisianni misilikkusulerparput Nuuk qimallugu najugaqarnissaq

Nuuk qimakkatsigu ernerput ingerlaannapajaaq kalaallisut oqaluttaleqqippoq avatangiisigut tamarmik kalaallisuinnaq oqalukkamik, qallunaatut piginnaasani pigiinnarpai ulluinnarnili kalaallisut oqaluttalerpoq. Tassuuna takusinnaalerpara aalajangersimanerput uagutsinnut eqqortuusimasoq.

Arnannguup iganini nangippaa. Qulleq sakkukillivoq, uia talerpiatungaaniittoq takuarput.

Piitaq angutaavoq 50-it inulaarlugit ukiulik.

Piitaq:

Perioriartorpugut piniartutut. Atuartuni siullerpaajullunga feeriartarpunga kippartaratta kujataamiusoorlugu. Taamatut inuuneq ingerlavoq.

Anaanaga 10-nik ukioqarlunga aatsaat takuara. Ulloq manna tikillugu ataataga ilisimangilara kinaanersoq.

Oqarluaannaruma aqqaneq marlunnik ukioqarlunga imigassartorneq aallartippara, imigassaq imertorujussuunikuuara. 19-nik ukioqarlunga allaat sprit-it imertalersimagaluarpakka. Inuuninni nuannernerpaatissimavara anniaatikka matuupiluuginnassallugit. Imigassamik ikiaroorntumik imaluunniit arlaannik. Taava inuunera suliarilerpara. 2007-imi 'Qaqiffippunga'. Qaqiffimmiinniini sorspassuit qaffakaapput, taakkua immaqa, isaasalerlugit, angajoqqaannik pissarsiarinngisakka matuuginnarsimani. Taavalu aamma taassuma malitsigisaanik arfinilinnik ukioqarlunga kinguaassiutikkut atornerlunneqarnikuunerma kingunerisai qaffakaallutit aallartipput. Inersimasunngorama angajoqqaakka assut pisuutittarsimavakka, illersorneqarsinnaasimanginnera assut qamuuna anniaatigalugu. Taanna atornerluineq ilaqutariinnitta iluani ingerlaartuulluni. Eqqaamasarpara anaanama anaananut unnerlukkualungu, arfinilinnik ukioqarlunga taamak pineqarama. Saariarluni ingerlaannaq uluakkut patippaanga "meeqqat taamakkuninnga oqalunneq ajorput!" Taamanili uummatiga sorsulluni aallartippoq mangertilluni.

Qaqiffinnissamma tungaanut, immaqa inuttut suliarilernissama tungaanut imigassartortinnanga arnarniarsinnaanngilanga, kannugivara imaluunniit avaannugivara. Taavalu aalakuuleraangama qanorsuaq iliorsinnaasarnikuullunga. Massakkut imigassamik ikiaroorntumillu ukiuni qulini atuinikuunngilanga.

Siullermik inatsisitigut ataataqanngitsuuneq soqutigisimangilara meerartaareernerma kingorna tikillugu. Taava paniga angajulleq aperimmat, anaanamma angutiviaa paasigamiuk uanga

ataatarinngikkiga taava tassanngaanniit eqeersagaasutullusooq ippunga, ataataga ugartariaqarlugu. Anaanaga aperisaraluarpara ulloq manna tikillugu oqarsinnaangilaq. Soorunami uannut ullut taakkua annernarput. Meeqqanut akilersuinissamut uppernarsaat nammineerlunga pigivara, taassuma angutip akilersuutigisimasaa, kisiannili eqqartuussivimmit allagarsivunga 1979-imili ataatassarsiuussineq naammassineqarani uniinnarsimasooq. Taava taakkua tunngavigalugit ataatassarsiuussineq eqqartuussivimmut suliassanngorteqqippara. Taassuma kingornatigut aaliangiiffigineqarpoq ingerlariaqqissiinnaanngitsunga. Siunnersorneqanngilanga annerusumik, kisiannilu aajuna tupinnartua Danmarkimi najugaqartuuguma ingerlaannaavillunga kina ataataginerlugu paasisinnaassagalarpara. Nunatsinni retlov-i equngasorujussuuvooq.

Uagut inatsisitigut ataataqanngitsut oqimaatsumik pineqarpugut. Saaffissaaleqinartorujussuuvooq. Ulloq manna tikillugu apersisaraluarpunga, inuit pisinnaatitaaffianut tunngasumik eqqartuussivimmut apuukkusullugu. Taarsiivigitinnissara eqqarsaatiginngilara kisianni paaserusunnerpaasara aajuna timikkut kingornuttakkap, massakkut nappaatigisama, taassuma suliarineqarnissaa. Danmarkimi pisussaataitaaffeqarpoq soorlu ataatasup imaluunniit anaanaasup toqoreersimappat ilivermiit qaqillugu inuup sananeqaataanik misissuisinnaallutik. Kisianni nunatsinni inatsit taanna atunngilaq. Eqqarsaaterpassuusarput, soorunami ilaannikkut aliasuttarpunga tamakkua eqqarsaatigigaangakkit. Meeraaniinnilli peroriartorninni taakkuninnga aamma aallaaveqartittarpara. Ataatanit pakkutaarneqarneq ajorpunga anaannit pakkutaarneqarnikuunerlunga eqqaamanngilara. Taakkua tungaanut kamak angajoqqaanut atortorujussuunikuuara.

Uanga qaangersinnaagunanngilara, inatsisitigut ataataqanngitsut eqqartorneqartillugit. Taamatullu immikkoortitaasimasutut misigisimajuartillunga allat periarfissinneqarput, kisiannili uagut periarfissinneqarata kingornussisinnaatitaanata. Alloriaqqinneq ajulernikuuvugut.

Qulliit sakkukillipput. Isiginnaartitsiviup saavani, isiginnaartut akornanni arnaq utoqqasaaq nikorfasooq erserpoq.

Larsine arnaavoq utoqqaangaatsiartoq. Isiginnaartut akornanni pisuppoq.

Larsine:

Uanga siuligut nersortuartaavakka. Inuit nukittuut. Eqqarsaatikkut ataqqinerpaavakka angakkut. Inuit piumassusilissuit taamani tupinnaqaat. Uanga Hans Egede immikkoortutut isiginngisaannarnikuuara. Asererterisutut taasinnaavara. Angakkut siulittalu upperisaraat uumasut uagutsituulli tarneqarnerat. Tassa pissaanilissuit. Siuligut tatigisorujussuullugit isigisarpakka. Taamanikkut taakku siuligut atuagaqanngillat, taamaallaat silami uumasut allallu atuakkatut atortarpaat. Massakkulluunniit immaqaa ilisimatuuniit qutsinnerussagaluarput tamakku ingerlassimagaluarunikkit.

Kristumiunngortitaanitta nalaani angakkut ajortuinnavittut isigineqartalerput. Katuallunniit attoqusaajunnaarpaat, naak qamuuna anguniakkamikkut nukittoorsuugaluartut. Kristumiunngorneq ilisimasamik annaasaqarnermik nassataqarpoq. Qangaaniit ilisimasagut akuersaarneqarlutik ingerlasimasuugaluarpata nalunngilara ullumikkut kalaallit qanoq angusarissaanerutigalutik ingerlasimassagaluartut.

Nunasiaataanerup nalaani meeraavugut. Misigisagut taamanikkut imaannaanngillat. Ullumikkuugaluarpat naammagittaalliortut ila qanoq amerlatigissagaluarnerpat. Taamanikkut ilinniartitaanngilluinnarpugut. Qallunaatut ilinniartitaanngilagut. Qallunaat qulit maani illoqarfitsinniittut niivertukkut, palasikkut, nakorsakkut akissarsiaat kalaalliniit qaffasinnerujussuupput.

1939-mi sorsunneqalerpat, tassa suli nunasiaalluta inuusuttuaraavugut. 40-mi apersortippunga. Uanga isumaliortarpunga sorsunneq iluaqutaasoq. *Larsine illalaarpoq* Tassami taamanikkut atukkagut, qanoq oqassaanga, killeqartorujussuugamik. Soorlu petroliuluunniit kalaallinut atugaaqqusaanngilaq ikuallajaneragooq pissutigalugu. Soorunami kingorna atuleratsigu ilikkannguarlugu. Sorsunneqalerpat qaammaasaqalerpugut avammullu ammaanarnerulerluta.

Periarfissat pitsaasorujussuunngikkaluartut pitsanngorput; nioqqutissat allanngorlutik. Sorsunnerup iluani nalaatagut ilinniariupput aammalu qaammaasaqaleriartornitsinnut iluaqutaallutik. Atuarfimmi inigatta angutit aalisartuupput arnallu ilinniarnissamut ullumikkutulli periarfissaqanngillat. Arnani atorfigineqartartoq kisiat ilinniarsimalaaraanni tassaavoq ernisussiortuuneq, allamik naamik. Illumilu kiffatut, igasuuneq, tassa tamakku qallunaanut kiffaernerit kisimik saariarfissat. Aatsaat tamatuma kingorna ilinniarfissuakku atulernikuupput, arnat periarfissaqarnerulerlutik.

Qujanartumik uanga illoqarfinniiginnaraluarlunga periarfissakka atorluarpakka; kommunalbestyrelsimi arnatatuaallunga ilaasortaasarnikuuvunga. Arnatut oqaasissaqanngitsut isigineqartaraluarlunga oqaasissakka oqaatigisarnikuuakka. Nersornaaserneqarlungalu pinikuuvunga.

Uangaana isumaliortartunga massakku inuusuttorpasuit ilinniartitaaneri usornaraluaqisut, suliluarsagassaqartut. Assersuutigalugu inuit inunngornitsinniit pikkoriffeqartarpugut, tunissutisiaraarput pisinnaasatsinnik atuisinnaanerput. Taanna atunngikkutsigu ingerlariaqqinnissarput killeqartorujussuavoq. Inuup pisinnaasaa, nammineq piumassuseq atorlugu ingerlasariaqartaratta.

Massakku ilinniartitaaneq ajunngikkaluaqisoq una ippigisariga inunngornitsinni piginnaanitta atorluarniarneqarneq ajornera. Pappiaralersorpallaarneq, soorlu karakteriliineq ajunngikkaluaqisoq, ilaa soorlu uppersaatitut atorneqartussaammami, kisianni inoqarpoq allanik pikkoriffeqartorujussuarnik. Inuusuttut ilannguit karakterigissanngitsut oqarluaannarlunga suffissaqanngitsut allaat atorsinnaanngitsut isigineqartarnerat isumaqatiginngilluinnarpara.

Imaaliortoqaraluaruni - inuk kinaluunniit piginnaaneqarmat - qiqaannarnagit taakku piginnaasai atorlugit aamma malinnaatissinnaaneqartariaqaraluartut, inuusuttut qanorluunniit atugaqaraluaangamik pikkoriffeqartarput, pikkoriffigisaasalu atorneqannginnerat qiimaatiginaviannigilaat siumullu ingerlariaqqissinnaanaviarnatik.

Nunatta pissarititaata pingaarnersaa tassaavoq inuk.

Larsine matukkut anivoq.

Isiginnaartitsivimmiippoq angut, issiaarpoq issiavimmini. Arnap pulaarppaa. Sakkak angutaavoq utoqqaangaatsiartoq, Arnamat oqaluttuarpoq.

Sakkak:

Tallimaannarnik ukioqartunga ataatagigaluara qallunaat naalagaaffiat sullillugu paarluni ajunaarpoq. Qallunaat naalagaaffiata uagut imminiiginnavinnikuuaatigut. Taamannarsuaq ukioqaleraluarlunga uanga puigorsinnaannginnakku inuuninni assorujorujussuaq atugarliorlunga alliartornikuuvunga ataataqannginnera peqqutaalluni.

Nukaqarpunga, taanna anaanama ukkatarilluarppaa. Qujanartumik aleqaqarama, taassuma ukkatarilluarpaanga. Anaanagigaluara ajoqimut kiffaagami pilersuisussaaruukkatta taassuma avannaanut aallartippaatigut.

Qatannugitiit arfiniliuvugut, sunnguamik sunnguamik tassa pilersorneerutiivilluta, suallanneqaratalu naalagaaffimmit. Umiarsuarmut ilaalluta Aasiannut ilaavugut. Aasianni ukiisarallarmat, issittartorsuusarallarmat Aasianni ukiisariaqarluta. Aasianniinnitsinni, meeraagattami, uanga qimminut tupigusoqaanga. Illup qalianiiginnarpugut, oqoruteqapajuppugummi. Upernassakkut aatsaat Ilulissanut aallaqqippugut.

Taava maaniileratta ilaqutariiulluta avissaartuuppugut. Uanga illoqarfimmi maani arnarsiakuloqalerpunga. Taannaana arnarsiakuloqarnera uanga inuuninni assorsuaq puigorsinnaanngisara. Taamannak ukioqalereeraluarnikuullunga ullumikkut iluamilluunniit pisussinnaanngilanga tassa arnarsiakkukka piitsuungaarmata natiinnarmi sinittarama. Mannalu issersuaq, sunnguamik oqoruteqarnanga. Ullaakkut ataasiaannarnanga itertarnikuuvunga kamikka qerruttut, taava atuarfimmu uunnasseriartortariaqartarpakka tassami atuartugama. Taava kingorna atuartuuninni nalunaarfigineqarpunga utoqqaq niivertukkut anartarfiani eqqaasoq ikiussagiga. Tassa taanna suliarisarpa atuariartunnginninni. Taanna utoqqannguaq tappiilluni ajaappiarami. Kingorna arlalinnik

arnarsiaqarpunga. Kiffaaffeqartarlunga, taamaasillunga aningaasarsiulirlunga.

Ujaqgerisoq Bornholmimeersoq qallunaatut ilikkarfigaara, allakkerisarallaramalu qallunaatut oqaluunneqartarama qallunaatut ilikkapallappunga.

Ullaaq aalajangersimasoq arfineq marlunnut qiteqqutsiaannartoq anartarfinnik anitsiartorluta aaneqariasaarpunga. Umiarsuunngooq qallunaat nunaanniit pajuttup usingiarnissaanut ikiuutissasunga. Atuarfinit aperisassaqaannginnama, ajoqerpulluunniit aperinagu, ukiuikinnera ippigigaluarlugu usingiaaqataajartuinnarpunga. Aappaagukkut apersortittussaagatta immaqa atisarluppallaaqigama apersortinnissannut ikiorniarlunga suliartoqquaanna.

Sunaaffa maani illut sanaartugaat nutaanik kiassaasersorniarlugit atortussat usingiagassaasut. Taakku qallunaat oqaatsimik ataatsiimilluunniit kalaallisut paasinnissinnaannginnamik assut iluatigaminnga. Usingiaanermanni sulisorilerpaannga. Umiarsuaq aallareertoq taakkunani sulisoriumammanna taakkunani sulilerpunga. Nalunaarfigineqarpunga suli qeqannginnama atuarnera inaarniarsarisagiga. Ataatsinngaanniit suliarortarpunga taamanikkullu qimmuttuaannaavippu taakku, unnukku qulinguluat qulit tungaanut suliuaannarput. Ilinniarninni karakterikka apparput ilinniarnissannut piffissaaruppunga. Inuunera tamaat ruujorilerisuuneq atorfiginikuuara. Kursusertarnikkut ilinniartuuninni sineriatsinni Uummannaminngaanniit Qeqertarsuatsiaat tikillugu suliffiginikuuakka ruujorilerisutut. Ruujorilerisutuut qallunaani ilinniartuusimavunga, taakkua suliffigisama angajoqqaavini - tappavunga avalaannikuugaminnga.

Inuunermini anneriuaannarnikuuara naalagaaffiup immiiginnarnikuugamitigut. Qatanngutiginni uanga eqqorneqarnerpaanikuuvunga. Arlaleriarujussuarlunga perlerlunga innartarnikuuvunga.

Rigsombudimut tamaasa nassuiarnikuuakka, pappialaatigaakkalu tamaasa. Kisianni advokatip ingerlattussaasimagamiuk, ajorsassagaluarumalu advokatimut akissaqananga. Inuiaat

piginnaaffii tikikkusuppakka taamannak pineqarnerput
paasisinnaannginnakku sooq.

Qallunaat naalagaaffianut uanga saammaassinnaanngilanga.

Arnap tusarnaakkani isigeriarlugu isiginnaartunut saappoq. Isiginnaartitsiviuq tunuani arnaq
alla nuivoq. Nivikka.

Nivikka arnaavoq 30-it sinnerlugit ukiulik. Arnamat oqaluttuarpoq.

Nivikka:

Uanga GU-mi sulivunga. Suliffinni sulisut amerlanerit qallunaajupput, ataasiakkaat kisimik kalaallisut oqaluttuullutik. Sulileqqaarama unammillernartutut isigisagara nammineq pigikkajunnerusarpara sulileqqammeriarama takoqqaalaarniarlugu qanoq innersoq. Taava ukiut ingerlanerini takusinnaajartulerpara, paasiartorpara unammillernartillugu kalaaliusutut kalaaliussutsimillu pingaartitsisutut qallunaarpassuit akornani sulinera.

Imminut illersoqqajaasalerpunga. Sunaluunniit kalaallinut tunngasoq qallunaaniit eqqaneqaraangat, imminut illersortalerpunga. Oqartoqarpat kalaallit qungujulaneq ilisarnaatigigaat, eqqarsartalerpunga atagumi 'karsinut poortorpallaarnata'. Qallunaat ilai aamma qungujulasorujussuusarput. Oqartoqarpat Pisiffimmi iipilit qulit 30 kroneqartut arlaallu oqarluni 'det' jo Grønland'.

Taava uanga ingerlaannaq malugilertarpara misigissuseq taanna pigisara eqqorneqartoq. Uffa nammineq taamatoqqissaat eqqarsartarlunga: pisiassaatigut akisuallaarput. Nammineq taamatut isumaqarpunga kisianni allat oqarpata allaanngilaq eqqorniarneqartunga. Ulluinnarni taamatut misigisarlungi unammillernartorujussuuvoq. Allaat eqqarsartalerlunga, uangaana isummersortartussaanngikkaluartunga? Imminut aperisalerpunga: sunaana pequutaasoq? Sunamitaavaana peqqutaalluni suleqatikka unamminartutut isigisarikka? Allaat inuuneq unamminartutut isigisalerlugu. Soorlu kalaaliussusera unammillerneqartoq, allannortinniarneqartoq. Allaat uanga qallunaanut isorinnittoortalerlunga eqqarsartarlunga: qallunaat-aasiit.

Maani GU-mi atuartuutigit inuusuttuaraapput amerlassoorpassuillu nunaqarfinningaanneersuullutik. Ilai illoqarfinnit mikinerusunit takkuppet. Amerlassoorpassuit qallunaatut oqaluffiunngitsunit takkuppet. Qallunaatut paasisinnaagaluarlutik ulluinnarni

oqalunnissartik tunuarsimaarfigisarpaat, ilinniartitsisut inaanni ilaanni tusartarpara atuartuutigunngooq pikkorluppallaqaat, GUnissaminunngooq tulluanngippallaarput pikkorloqigamik. Uanga masterimik aatsaat massakut ilinniarpunga, maanilu qallunaat ilinniartitsisut amerlanerit mastereqarlutik. Ataasiaannarnanga tusarnikuuara uagut ilinniartitsisut ilinniarnigut appasippallaartut, toqqaannartumik assortuunnermik kinguneqartartumik. Uanga imak eqqarsartarama: imaassinnaavoq ilinniagara ilissitut inngitsoq kisianni atuartuutigut eqqarsaatigalugit, atuartuutitta sumiiffii eqqarsaatigalugit immaqa ilissituullu pikkoritsigalunga atuartitsisinnaavunga, immaqaluunniit ilissinniit pikkorinnerusinnaavunga.

Isummersortarnera suli sakkortusiartorpoq taavalu aamma isummersortarnerma ilumoorfiginissaa aamma pikkoriffigisorujussuanngorpara. Soorlu siornatigut immaqa taamatut isummersoraangatta assortuukkaangatta immaqa nakkaannartarsimavunga imak oqarlunga "ah ok utoqqatserpunga paasisinnaavakkit". Taanna qimaamillugu maluginikuuara isummertarnerma ilumoorfiginera angunikuullugu. Uanga kinaassusera ataqqivara: kalaaliuvunga, ilinniagaqarpunga, meeraqarpunga, meeqqakka kalaallisut oqalussapput. Kalaaliunera illersortariaqarpara pissutigalugu nunarput namminersuleriartuaarmat aamma misigisimagama peqataasariaqarlunga akisussaaffeqarlungalugu. Meeqqama aamma nunatsinnut arlaatigut pilliuteqarnissaat eqqarsaatigalugu. Taanna ilumoorfigisorujussuara. Imatut soorlu oqaluttut tusartuutarakkit: 'Kalaallit Nunaat namminersulivinnaviannngilaq makkua makkua aningaasanut tunngasut nunap isikkuanut tunngasut', ilaa europamiorpalaartut tamakkua ilisimasarsui tusartuutarpagut, tunngavilersuutigineqartut - nunatta namminersulivinngilluinnarnera eqqartorneqartoq.

Ulluinnarni kalaallit qallunaallu suleqatigiissinnaavugut, aamma ikinngutigigiissinnaaqaagut. Akimmiffeqartarnigulli isertorneqarsinnaanngillat. Taannalu naapissinnaannginnermik kinguneqartarpoq. Tamanna nipaarsaarukkunnaartariaqarpoq naapiffeqartariaqarlunilu. Naluara qanoq isilluta akiuukkunnaarumaarnersugut, kisianni neriuppunga akiuukkunnaarumaartugut. Imminut illersortuarneq assortuuttuarnerlu qatsunnaqaat.

Inuaqatigiinni akisussaaffimmik tiguisoqartariaqalerpoq, apeqquq silaannarmiitsikkaanni susoqarnaviangilaq. Paaseqatigiinnissaq isumakkeerfiginninnissarlu pisariaqalerput.

Kikkulluunniit kammagilersinnaavagut. Kikkulluunniit ajunngitsumik inooqatigisinnaavagut, kisianni isiginngitsuusaarsinnaajunnaarpugut. Kalaallit qallunaallu assigiinngillat. Assigiinngissutigut atorlugit inooqatigiinnissaq ilikkartariaqarparput.

Saavani angut utoqqasaaq nueqqippoq.

Arnaq suli isiginnaartitsivimmiippoq. Ole angutaavoq utoqqaq, isiginnaartunut oqaluppoq.

Ole:

Aalisartuunngorusuttut piniartunngorusuttut akornaniissimavunga nunaqarfippummi piniartoqarfiummat, taamanikkut. Piniartunut qaninniartarlunga, aalisartunullu ikaarsaaleruttorfiup nalaani malinnaallunga. Ataataga aalisartuusimavoq, qaannamik piniartuunini nangiarnarilersimagamiuk aalisarnerinnaq ingerlakkaa silattorpugut.

Qatanngutigigiilluta ikioqatigiilluta ataatarput aalisaqatigisarnikuuarput.

Meeqqat atuarfiani nunaqarfinni taamani kalaaliinnaviit ilinniartitsisuupput. Qallunaat qaqutigoorput. Uagut kalaaliinnarnik ilinniartitsisoqarpugut. Assorujussuaq peqqissiminartarpoq inuunertusilluni qallunaatut pisinnaannginneq. Inuunermut kukkussutitsinnut ilaavoq. Soorlu pilersaarusernermi imaluunniit arlaanni pulaniarnermi qallunaatut oqalussinnaannginneq uannut aporfusarnikooqaaq aammalu kukkussutaasarluni paatsoornernut ilanngulluni.

Qallunaatut oqalussinnaannginnera paatsoorfiginagu aalisartutut ingerlaannarpunga. Aningaasanik atorlunga umiatsiaarartaarpunga, ataatagalu napparsimalluni pisinnaajunnaarmat qatanngutinni angajulliugama nukkakka marluk peqatigalugit ingerlatsisunngorpunga.

Saarullinniarniq qaleralinniarnierlu pingaaruteqarnerpaatut ingerlappakka. Ukiorpanni. Taava 1971-imi raajarniarnermut nuuppugut. Angallammik raajarniummik pissarsinerput aallartillugu. 1975-imi skat-i atulerneraniit sulisitsisutut normutaarpugut. 90-imi qaleralinniarnermut uteqqippunga.

Nuannersumik ajungitsumik ingerlavunga. 2000-ikkunni nuliara kræfterluni napparsimalermat Danmarkiliaqattaarpunga peqqissartoq ilagisaqattaarlugu. 2006-imi angallatiga aalisariummik taarserpara. Angallateqassagaanni angallat iluamik nakkutigisariaqarpoq: ullut tamaasa, ullut tamarluinnaasa. Angalaarnera aammalu inuttat tungaatigut ingerlassinnaaneri assut

aporfinngorput, Nuummi revisorinik suleqateqaraluarpunga. Angallatip aningaasarsiai bankimut tunniuttariaqalerpakka inuttanut akilersuinissannut periarfissaarukkama. Angallatiga suliffissaqarnissamut tunngaviusoq paasivara. Qallunaatut oqaatsinik paasisinnaannginnera tunngavigalugu paatsoornerujussuaq aallartippoq. Aqutsineq pitsaajunnaarpoq, taassumalu kinguneraa Aalisarnermik Pisorta qarfillu suleqatigiissinnaajunnaarnerput. Aalisarnermut akuersissutigannaavara.

Taanna pisorta qarfimmi aqutsisoq tamakkuninnga aalisariutinik angalatitsiniarnermut tunngasunik misilittagaqarpallaarsimagunannginami, tassa aporaaffinngorami. Ilinniarsimasuunanga aalisartuullunga inatsisikujussuit maleruagassat atuaqqissarnissaannut periarfissaqannginnama. Nuliara toqummat aalisaleqqinniarlunga paasivara akuersissut annaavissimallugu. Pisoq ilungersunaqaaq assut.

Ulloq manna tikillugu suli akuersissummik pisinnaanngilanga. Ernuttakka marluk aamma akuersissutinik pisinnaanngillat. Ulluni makkunani bankimi kukkussutigini kuusara ataaseq massakkumut assut naalliutigaara, angallatiga paatsoornikkut illunnet bankimi qulaarnaveequtigisussanngorlugu atsiornikuugama. Ernerma taanna akilersorneruaa, uanga utoqqalinersiutaannaqarama akilersuisinnaannginnama. Nukillaarnartorujussuuvoq.

Pisorta qarfinnut arlaleriarlunga naammagittaalliornikuugaluarpunga. Aalisarnerup inatsisiliorneqalernerani utoqqaat isumakkeerfigineqarnissaannut tunngasumi kisima minitaavunga. Utoqqaat allat pisassatik tunivaat akiitsuilu isumakkeerfigineqarlutik, akuersissutip akiata naleqassusaanut.

Kukkussutigannaerpaaq eqqarsaatigisaqara ajuusaarutigisarlugulu. Tunniutiinnarusunngeqaanga. Pisinnaasara tamaat ajornartorsiutigannaq angerniarpara. Kukkussutiganna uaniikkami bankimiinninni oqalutseqannginnera. Illora tunuliaquttatut ikkuttussaanagu ikkuttoorakku. Assorujussuaq ilungersuutigaa massakkut. Kisianni tassa allatut ajornartumik akueralugu ulloq manna tikillugu neriuppunga. Naluara suli qanoq ililluguluunniit qaangersinnaallugu kisianni suli neriuteqarpunga.

Nuka isiginnaartitsiviup sinaanit nuivoq torersaasilerlunilu. Nuka 60-it sinnerlugit ukioqarpoq.

Nuka:

Uanga 1950-imi inunngorpunga, nunasiaateqarnerup ingerlanerani peroriartorlunga.

Taamanikkut qallunaangorsaalermeta eqqaamavara akerliusorpasuuqaluartut. Taamani kalaalerpasuit nikisinneqarsinnaannginnerarput, akerliusarnikooqisut eqqaamavara, allaat ilaatigut allagartarsualisaarlutik soorlu ingeniørinut qallunaanut, naak taakku immaq oqartussaavallaanngikkaluartut.

Taamanikkut uagut illoqarfitsinni qallunaarpassuupput, sulisartorparpassuit. Kalaallit qallunaallu imminnut qanittuunngillat. Taamani uanga aamma qallunaanut paarsisuuvunga, kiffaanngilanga, kisianni paarsisoq. Taamani tusaasinnaasarpakka qallunaat kalaallinut qanoq isiginninneri. Kinguarsimasutut isiginninneri ersittarput. Oqaatsit taamaattut tusaallugit soorunami naqinnartarpoq, imatut ajukkuusaarnarsisarluni.

Qallunaat taamanikkut assut ataqqineqarput. Atorfikkaaq kalaaleq ataaseq eqqaamavara, qasseriartorlunga naammattoortarpara... Pisiniarfimminngaanniit anileraangami qallunaap malikkaangani matu ammartarpaa ima ilillunilu mappiullugu sikisaarfigalugu.

Nuummiillunga atuarfeqarfimmi sulillunga kalaaliunera pillugu immikkoortinneqartarneq misiginikuuara. Taamanikkut una ilinniagaq aallarnisaat barnemedhjælper piugallarmat, naammassereernikullugu sulillunga. Ningiorisara ernisussaammat taarserneqartussaasoq nalunnginnakku, uanga taamani misigivunga taartaasinnaallunga. Tassami ilinniagarigakku. Suleqatigut kalaalinnaapput, ningiorput qallunaaq. Ningiutta taartissaa aalajangerneqarpoq tassaassasoq una qallunaaq 'husmor-eq' angerlarsimaffimminiiginnartartoq. Kalaallisut oqalussinnaanngitsoq, kalaallisut paasisinnaanngitsoq. Aali uanga kalaallisut paasisinnaasunga qallunaatut aamma oqalussinnaasunga – meeqqerivimmi qallunaajarartaqalaarmat . Assut

paasiuminaatsissuaarnikuuara sooq taanna arnaq
toqqarneqarnersoq. Tupigusussuaarnikuuvunga.

Qallunaat oqartussaassuseqarsuaaramik taamani. Arlaannik
katerittoqassagaangat pilersaarusiortunut ilaasarnikuuvunga.
Ataasiarlunga marlunnik ataatsimiigiarfissaqarlunga
ataatsimiigiarfiga siulleq naammassimmat aappaattut
ataatsimiigiarfissara ornikkakku, ataatsimiissimallutik anisut.
Pappialaq piareersagartik takutippaat, pileriallarakku
qallunaatuinnaaveqqeqqissaaq allassimasut. Oqaasissat,
erinarsugassat, aliikkutassat. Taava oqarlunga: "uu sooruna
qallunaatuinnaasut atuartitagunuku kalaaliararpasuit,
nunatsinniippugut." Ilaa kulturertup malillugu sungiusagassagut,
"uanga ilanngussassaqaarsinnaagaluarpunga" oqarlunga,
qujanartumik taamanikkut piareersasioqataasumik
kalaalersaqaratta, qujanartumik aaqqipput.

Tassa taamatut ingerlasarput. Taava illoqarfimmut perorfinnut
nooreerlunga ukiorpaaluit maani sulereerlunga, 2000
ingerlaloreersaq pikkorissartussanngoratta pikkorissarfimmut
inissippunga kulturimut tunngasutilerujussuaq, massakkuusuuppat
immaqa qilaatersorneq ilaassagaluarpoq. Taava ullut qassit
ingerlareersut pileriallarakku sammisagut tamaavimmik
qallunaatuujusut. Taava uanga tupigutsattorujussuugama tassami
kalaalinngorsaaneq ilaa ingerlasoriniarlugu, tupigutsariarlunga
narrujuummilerpunga narrujuummilerpunga, misigissutsikkut
nuannaarunnaavillunga, nanertisimasutulluunniit ilerlunga.

Tamaanikkut tupappunga naqisimaneqarnerup sulit atuunera
takullugu. Pingaarutillit makku, kulturitsinnut kinaassutitsinnullu
tunngasut kalaallisoortariaqaraluararamik.
Siulitta qallunaanut ataqqinninnerujussuaq pigisimappassuk aamma
kinguuanut ingerlaqqissinnaasarpoq.

Nukap torersaanini naammassivaa. Sika iserpoq.

Sika arnaavoq 40 – 50-it missaanik ukiulik.

Sika:

Naalungiarsuusungali anaanaga aappartaarsimavoq. Taamanikkulli angut taanna ataartaartulersimavara. Ataartaartukkama immikkoortittuaannarnikuuaanga uanga paasisinnaanngisannik. Paasiuminaatsitsinermik atugaqarnera ukiuni amerlasuuni atorpara. Ataatarsiara aalisartuuvoq, raajarniuteqarluni. Aallaraangat nuannaalertarpunga tikikkaangallu annilaangalertarlunga. Inuttut malersugarinikuuaanga, allaat kinguaassiutitigut atornerlullunga. Qipiup ataatigut attuualaarinnilluni, qipiga nissunnut poortoqqissaartarnikuuara ataatassama assani pulatinnginniassammagit.

Taamanikkut taamatut pineqarnerma kingunerilerpaa imminut tatigiunnaavittarnera. Anaanamami oqaluttuuttarnikuunngilaanga allamik ataataqartunga.

Anaanaga taannalu aapparisa a imertuunngillat, ataatarsiamali anaanannut pasilliinerujussuaq pigaa. Ataatarsiama pissusaa ulorianarpallaalermat anaanaga qimaavoq. Uanga qatanngutikka isumagisariaqalerlugit. Ataatarsiara aallaqqasoq anaanama meeqqat tikisippai, uanga billestsivakka anaanarput ilagiartorpaat, uanga ilaananga. Ataatarsiara tikikkami meeqqani tammaalerlugit apersulerpaanga uangalu akivara illinuku aallaqqugakkit aallartut. Tassani ataatarsiama ajortumik pisarnikuugaluarlunga tulaavigivaanga suli ulloq manna paasisinnaanngisannik. Taamani aappartaaralu anaanama illoqarfigisaanut nuuppugut.

Taamaalluta issiaartilluta ajama ataatagagooq illoqarfigilikkatsinniittoq. Sapiiserlunga anaanaga allamik ataataqarnerlunga aperaara. Anaanaga nammineq oqaluttuarluni aallartipooq uanga pillunga. Ersisimalluni, annaaqinagamingagooq kalerriisimangilaq. Utoqqatsissutit. Ukiorpassuit isertugaasimasunga, allamik ataataqartunga.

Aliasorujussuarneq, kamaqarnerujussuarlu pigilerpalla. Ingammik angutitut kamaqartorujussuullunga. Angutitik tallimanik atornerlunneqarnikuuvunga.

Sika qissaserpoq

Uinnguara sussuteqanngittoq unatartarsimavara angutitut kamaqangaama. Allaasimagaluaruni, uinnguama qimareersimassagaluarpaanga. Kisianni katsorsartarninni kamaga annikiliartorsimavoq. Massakut kamassaarnikuuvunga, uannullu oqarfiginikuuvunga: kamaqqinnavianngilanga uanga uinnut. Isumakkeerfiginikuuakka taakkua tamarmik. Soorunami takkuttarpoq annernartorsuaq, kamassara takkukkaangat imminut eqqissisartarpunga trøstespiserlunga, unnutturlu imminut tuppallersarniarlunga sukujunnik nerisarpunga. Suli taanna trøstespiserarnera suliarineqanngilara.

Atornerlunneqarnikuunera kamattarneralu suliarinikuuakka. Kamattarnera suli takkuttarpoq kisianni misigissutsit taakku oqilinikuupput. Ataatarsiara ataartaartugara isumakkeerfiginikuuara. Atornerluinikut allat taakku sisamat tamarmik imminornikuupput. Arlaatigut paasisinnaavara imminornerat, ajortuliortuugamimmi. Taakku aamma isumakkeerfiginikuuakka.

Suliaq oqimaakkaluaqisoq qaangernarsimavara. Inuunera uanga ingerlaqqissappat, anersaakut tarnikkullu timera nukittussappat, taamatut iliorsimavunga.

Imminut suliarinngikkallarama qatanngutikka usorisarsimavakka ilinniagaqartut, uangami kisima qatanngutinni ilinniagaqannginnama. Imminut tatiginnginnermik saperlunga eqqarsartarama. Meeqquerivimmi asaasutut sulininni ningiuama takusinnaasimavaa meeqqanut immikkut piginnaaneqartunga, kajumissaarpaangalu ilinniaqqullunga. Kajumissaarneqarnera pingaaruteqaqaaq.

Atuarninni paasilersimavara pikkoriffissuarnik ulikkaarlunga, uannut nikagiinnarlunga, tatiginngiinnarlunga, taakku sunniutaat peqqutaallutik taamatut unittooqqagaluarlunga.

Qallunat oqaasii unamminartikkakkit perorsaasutut ilinniarusuttaraluarlunga uniinnartarnikuugama. Atuakkat

misilitsinnerillu qallunaatoortarmata. Merit-illi takkummata
kalaallisut ingerlasumik perorsaasutut ilinniartoqarsinnaalerpoq
periarfissanngorpoq. Taannalu naammassivara,
imaannaangissimagaluaqisoq.

Sika qungujuppoq

Lars isiginnaartut akornannit nikuippoq, saallugillu oqalulerluni. Lars angutaavoq 60-it sinnerlugit ukiulik

Lars:

Uagut ima silattorpugut: upernaat tamaasa, upernaat tamaviisa, ataatarput anaanarpullu ilagalugit aallaartarpugut, tupertarpugut, piniagassat malersortarpagut. Puisit sumiinneri aallaavigalugit sikup ajorsiatornera malillugu piniagassat nuuffigisarpagut.

Nukappiaqqat piniartussatut perorsarneqartarput, niviarsiaqqat piniartut nuliassaattut. Annertunerusumik taamanikkut sulisartuuneq eqqarsaatigineqarpallaarneq ajorpoq. Juumooq, niuertoq aamma ajoqi tassaapput nunaqarfimmi suliffeqartut. Sinneri piniartutut inuussutissarsiuteqarput.

Taamanikkut piniartut tassaapput imminut napatittut, nammineq inuunertik tulluussimaarutigalugu imminnut naammagisimaartut. Taanna meeraagallaratta misigisarparput.

Taanna uanga maannakkut qamani aamma pigivara; nammineq napatikkusunneq, nammineq inuutikkusunneq, nammineq aningaasarsiorusunneq taanna siulinninngaanniit pissarsiarisimavara. Tupinnanngilaq siulikka eqqarsaatigisarakkit, kristumiussuseq ukiut 100 sinnilaarlugit maani Tasiilap eqqaani aatsaat atuutilerpoq, avataaniit sunnerneqarneq suli nutaajusorujussuuvoq.

Isertumi meeraaniitta nalaani eqqatsinni qallunaat silasiorfeqarput. Qallunaat taakaniittut sulisartuupput. Taamanikkut qallunaat pikkorisorsuartut inissittarnikuaagut, qununartorsuit kalaallinut ilinniagaqanngitsunut naleqqiullugit pavungarsuaq inissisimasut. Qallunaanik isiginnittaaserput sunnerneqarpoq qallunaat tassaalerlutik naalagaasussat, kalaallinik naqisimannillutik inuuneqartitsisussat. Uanga taamatut misigisarpara.

Qangaaniilli upperisaqarneq nunarsuarmi sumiluunniit ingerlasimavoq. Siuligut qangaaniilli upperisaqarnertik ingerlassimavaat ajunngitsoq ajortorlu upperalugu. Soorlu angakkut

ilisiitsullu assersuunneqarsinnaasut ajunngitsumut ajortumullu. Ajoqersuiartortitaanerup eqqunnerata kingunerani oqaatigineqartalersimasoq, angajoqqaamma ilaanni oqaatigisartagaat, ullumikkut eqqarsaatigisaqaara: 'uanga ajortormiuusunga siulikka kuisimasuusimannginerat pissutigalugu ajortumut kiffaasunga'. Taamatut oqarnermi qulaaninngaanniit naqinneqareerpugut oqarluta, uagut tassa ajortormiuuvugut, pisinnaanngilagut allamiut ajunngitsuupput: qallunaat ajunngitsuupput kalaallit ajortuupput.

Tulluusimaarutigisarpunga uanga nammineq tunumiuugama, nammineq napatissinnaallunga inuugama. Qujanaqaaq tunumiuugama. Taamatut maannakkut nammineq eqqarsaatigisarpunga naak meeraagallarama eqqarsartarlunga tunumiuugama piniartukkormiuusoq susinnaanngitsoq, ilinniarsimanngitsoq, atorfissaqanngitsoq, taamatullu inissinneqartarneq qaangernikuuara.

Ullumikkut killiffitsinni malugiartuinnarpara 'sapertugut'-mik eqqarsartarneq atugaaqisoq. Uangami aamma imminut assersuutigissaguma taanna misigisarpara, kisianni ullumikkut killormut mumisillugu eqqarsartalernikuuvunga.

Taamanikkut kristumiuussuseq eqqunneqanngikkallarmat maani inuusut naqisimaneqanngillat, imminut napatipput, imminut inuutipput, avataaninngaanniit ikiorneqanngikkunik nalunngilaat inuusinnaallutik, taamaattumik nammineq napatinniarlutik inuunikuusimapput. Ullumikkulli maani kinguaariit eqqarsaatigigaanni amerlasoorpassuupput utaqqiinnartunngornikuusut, allattoqarfiup imaluunniit inunnik isumaginnittoqarfiup aatsaat ikiorpatsik namminneq inuusussat.

Ineriartorneq taamak ingerlaannassappat ernumassutigaara Tunumiut amerlasuut katagarneqassasut, ilinniarsimanngitsummi amerlaqimmata. Qaammarsaalertariaqarpugut.

Meerartatta ilinniarluarnissaat kissaatiginarpoq, naammagisut. Taamanikkut atugarisimasagut atugareqqilertariaqarpagut. Siunissamimi takorluugaraarput namminersulernissaq. Uagut kalaallit siunissarput qaamasumik takorloorparput. Ullumikkumut naleqqussarneq nunarsuarmioqataasutut naleqqussarneq pisariaqarpoq.

15 - NAGGASIINEQ

Arnap isiginnaartitsiviup saagorsui saagorpai.

Arnaq: Qallunaat qanoq pinngorsimaneranik unikkaa qaluttuarpoq, inuit qallunaallu akersuuttuarnert unikumaartoq, qallunaat naggataatigut uppisinneqassasut inuillu naalaganngorlutik.

Naluaara uppisitsisariaqarnersugut, kisianni nalunngilara inuppassuit oqilisaaffigineqarusuttut. Anniaatinit. Immikkoorsitaasutut misiginermit. Iluaagisanik oqaluttuortoq kiffaanngissutsimik arlaatigut imminut tunisarpaq.

Saammaattariaqarneq. Saammaakkusunneq.
Inuk imminut saammaalli, oqaluttuarisaaneq saammaalliuk. Eqimattat imminnut saammaasseqatigiillik. Kinguaariit saammaasseqatigiillik.

Nuna manna. *Arnap nateq attoriarlugu natermut innarpaq.*
Inuit makku. *Arnap isiginnaartut isigai.*
Inuit nunaat. *Arnaq sanimut isigaaq, nateq attorlugu.*

Arnaq natermut innarpaq inngeqqilerlunilu. Nittaallat nakkaapput.

NAAVOQ
